

## PENGAJIAN KITAB IHYA' 'ULUMIDDIN kali ke-20

### Kuliah Maghrib kali ke-104

Ditanyakan kepada Imam Asy-Syafi'i tentang suatu masalah, maka dia diam. Ketika ditanyakan lagi : *"Mengapa tuan tidak menjawab? Kiranya Allah merahmati tuan."*

Maka beliau menjawab : *"Aku berfikir, sehinggalah aku mengetahui mana yang lebih baik, pada diamku ataupun jawapanku."*

Lihatlah betapa diawasi lidahnya sedangkan lidah itu adalah anggota badan yang paling berkuasa bagi ulama fiqh dan paling payah mengekang dan menundukkannya. Dengan itu, jelaslah bahawa dia tidak berkata-kata atau diam kecuali untuk memperoleh keutamaan dan pahala.

Berkata Imam Asy-Syafi'i : *"Seorang ahli falsafah menulis surat kepada seorang ahli falsafah. Antara isinya : "Engkau telah mendapat ilmu, maka janganlah engkau kotorkan ilmumu itu dengan kegelapan dosa. Nanti engkau akan tinggal dalam kegelapan pada hari ahli ilmu bekerja dengan nur ilmunya."*

Adapaun zuhudnya maka Imam Asy-Syafi'i berkata : *"Barangsiapa mendakwakan bahawa dia mengumpulkan antara cinta kepada dunia dan cinta kepada Pencipta dunia dalam hati nuraninya, maka dia itu berbohong."*

Berkata Al-Humaidi : *"Imam Asy-Syafi'i pergi ke Yaman bersama beberapa orang pembesar negeri. Lalu dia berangkat ke Makkah dengan membawa wang 10,000 dirham. Di luar kota Makkah dibangunnya suatu tempat tinggal. Maka berdatanganlah manusia kepadanya. Dia terus menetap di tempat itu sampai wang itu habis dibahagi-bahagikannya."*

Betapa kuat zuhudnya dan sangat takutnya kepada Allah Ta'ala serta kemahuannya dengan akhirat adalah dibuktikan oleh apa yang diriwayatkan bahawa sesungguhnya Sufyan bin 'Uyainah meriwayatkan suatu hadith tentang sifat yang halus-halus, lalu pengsanlah Asy-Syafi'i. Maka orang mengatakan kepadanya Imam Asy-Syafi'i sudah meninggal dunia. Lalu Sufyan menjawab : *"Jika benarlah dia sudah meninggal, maka sudah meninggallah orang yang paling utama pada zamannya."*

Dan apa yang diriwayatkan Abdullah bin Muhammad Al-Balawi dengan katanya : " Adalah aku dan Umar bin Nabttag duduk memperkatakan tentang orang 'abid dan orang zahid. Maka berkata Umar kepadaku : "Belum pernah aku melihat orang yang lebih wara' dan lancar berbicara daripada Muhammad bin Idris Asy-Syafi'i. Aku, Imam Asy-Syafi'i dan Al-Harits bin Lubaid pergi ke Bukit Safa. Al-Harits ialah murid As-Salih Al-Marri. Dia mula membaca Al-Quran. Adalah dia mempunyai suara merdu, lalu membaca ayat ini :

***"Inilah hari yang di kala itu mereka tidak dapat berbicara. Dan kepada mereka tiada diberikan keizinan, sehingga mereka dapat memajukan keberatan (pembelaan)."*** (Mursalat : 35-36)

Maka aku lihat Imam Asy-Syafi'i berubah warna mukanya, berkerut kulit keningnya, badannya gementar lalu jatuh tersungkur.

Imam Asy-Syafi'i berkata kepada Abdullah bin Muhammad Al-Balawi : *"Orang yang ada padanya 3 perkara, maka sempurnalah imannya : orang yang menegakkan amar ma'ruf terhadap orang lain dan terhadap dirinya, orang yang menjalankan nahi mungkar terhadap orang lain dan terhadap dirinya, dan orang yang menjaga batas-batas yang ditentukan Allah Ta'ala."*

Maka Imam Asy-Syafi'i tidaklah memperolehi ketakutan dan kezuhudan itu daripada kitab berjual-beli dan sewa-menyewa dan kitab-kitab fiqh lain. Tetapi diperolehinya daripada ilmu akhirat yang

bersumberkan Al-Quran dan Hadith, kerana hukum daripada orang-orang terdahulu dan yang terkemudian tersimpan padanya.

Imam Asy-Syafi'i berkata : Barangsiapa tiada menjaga dirinya, maka tidak bergunalah ilmunya."

Pada suatu hari bertanyalah ia (Abdul Qadir bin Abdul Aziz) kepada Imam Asy-Syafi'i : "Manakah yang lebih utama : sabar diuji ataupun diberi keteguhan hati?"

Maka menjawab Asy-Syafi'i : "Diberi keteguhan hati adalah darjat nabi-nabi. Dan tidak ada keteguhan hati itu selain sesudah diuji. Tidakkah engkau melihat yang Allah Ta'ala menguji Nabi Ibrahim as. Kemudian Dia memberikannya ketetapan hati? Dia menguji Nabi Musa as, kemudian Dia memberikannya ketetapan hati. Dia menguji Nabi Ayyub as, kemudian dia memberikannya ketetapan hati. Dan Dia menguji Nabi Sulaiman as, kemudian Dia memberikannya ketetapan hati dan menganugerahinya kerajaan. Maka ketetapan hati itu adalah darjat yang paling utama."

Kata-kata tersebut dari Imam Syafi'i menunjukkan betapa melaut fahamnya akan rahsia yang terkandung dalam Al-Quran, dan penglihatannya tentang kedudukan orang-orang yang menuju kepada Allah Ta'ala, baik nabi-nabi atau wali-wali. Semuanya itu ialah ilmu akhirat.

## INTIPATI PELAJARAN KALI INI

Kita hendaklah berkata-kata dengan ilmu dan pemahaman, bukan dengan agak-agakan atau mengikut perasaan. Sekiranya kita kurang pengetahuan tentang sesuatu perkara, lebih-lebih lagi dalam hal ehwal agama, lebih baiklah kita berdiam diri. Begitu lebih selamat.

Apabila kita sudah ada ilmu, janganlah kita mencemarinya dengan dosa-dosa.

Ramai orang mengaku mencintai Tuhan tetapi amal hati dan amal zahir mereka jelas menunjukkan mereka mencintai dunia. Mencintai Tuhan dan mencintai dunia tidak boleh berada dalam satu hati serentak.

Mencintai dunia salah, meninggalkan terus dunia pun salah. Yang betulnya, ambillah dunia dan/tapi cintailah Allah.

Kita hendaklah membiasakan diri berkorban wang dan harta pada jalan Allah, tetapi janganlah sampai kita sengaja mencari hidup yang dalam kesempitan dan selalu menyusahkan orang lain.

Bacalah Al-Quran setiap hari, dan baca jugalah tafsir atau terjemahannya setiap hari. Oleh itu belilah sekurang-kurangnya sebuah Quran yang ada terjemahan. Dengan mengetahui maknanya, dapatlah kita menghayati maksud kalam Tuhan di dalamnya.

Dalam usaha mencapai kesempurnaan iman, kita mestilah melaksanakan amar makruf (mengajak kepada kebaikan) dan nahi mungkar (mencegah daripada kemungkaran).

Umumnya dalam kitab-kitab fiqh tidak ada ilmu soal-soal hati. Sesiapa yang berasa cukup dengan pelajaran dan kitab-kitab fiqh, berada dalam kerugian yang amat sangat.

## IMBAS KEMBALI PELAJARAN LALU

Nilai sendiri diri kita berada dalam golongan yang mana :

1. Ada ilmu tapi sangat kurang amal.]
2. Banyak amal tapi sangat kurang ilmu.
3. Ada ilmu dan ada amal.
4. Banyak ilmu dan banyak amal.

Ilmu tanpa amal ibarat pemanah yang tidak berlatih memanah. Amal tanpa ilmu ibarat pemanah yang tidak ada ilmu memanah. Ilmu dengan amal ibarat seorang pemanah yang banyak ilmu memanah dan selalu berlatih memanah.

Tindakan kita sekarang?

1. Cari ilmu agama sebanyak mungkin sementara masih berpeluang.
2. Tambah amal-amal daris ehari ke sehari.

5 mazhab fiqh utama :

1. Mazhab Hanafi – Imam Abu Hanifah
2. Mazhab Maliki – Imam Malik
3. Mazhab Syafi'i – Imam Asy-Syafi'i
4. Mazhab Hanbali – Imam Ahmad bin Hanbal
5. Mazhab Ath-Thauri – Imam Sufyan Ath-Thauri

Umumnya, ulama-ulama fiqh terdahulu tinggi tasawuf mereka, sedangkan ulama-ulama fiqh terkemudian hanya mengejar ilmu fiqh sahaja. Ramai ilmuwan agama hari ini khususnya di bidang fiqh, hanya mencontohi keilmuan para ulama fiqh terdahulu tetapi tidak mencontohi tasawuf mereka.

Antara amalan Imam Asy-Syafi'i :

1. Membahagikan malamnya kepada 3 – ilmu, berehat dan ibadah.
2. Khatam 2 kali Quran sehari ketika solat pada bulan Ramadhan.

3. Tidak makan sampai kenyang selama 16 tahun.

## MAKLUMAN

Anda terlepas kuliah-kuliah syarah kitab Ihya' 'Ulumiddin yang lepas-lepas? Usah kkuatir!

Semua siri kuliah kitab Ihya' 'Ulumiddin di surau ini boleh didengar semula di internet di:

1. Youtube (taipkan "syarah ihya").
2. Laman <http://syarahihya.blogspot.com/>
3. Laman AlMuttaqinTv bawah Yayasan Islam Kedah.

Sehingga kini sudah ada **117 fail** kuliah Syarah Ihya' 'Ulumiddin di internet (di Youtube). Setiap satunya sepanjang lebih kurang 8 minit. Terdapat 99 fail audio dan 11 fail video. Selamat mengambil manfaat.



